

«el mar» – temps d'esser libers

■ (cp) La grupp da rock turitgaisa-rumantscha «el mar» preschenta ses emprim album «temps d'esser libers». Il batten da l'album ha lieu sonda, ils 2 da december a las 20.30 en il Helsinkklub a Turitg (Geroldstrasse 35). «Tems d'esser libers» – sin la cuverta dal primalbum da la grupp «el mar» ha in utschè rut cun violenza il giatter da la cabgia ed è sglà davent. In dessegn da l'artista *Pia Valär* ch'illustrescha fitg bain il tun da questa grupp da rock turitgaisa-rumantscha: Sias chanzuns seguan ritems bain structurads, ma las armonias laschan resenir inquala dissonanza e las melodias fladan bramas da partir, da sa deliberar. Ma ins auda er

segns da la veglia enreschadetgna muntagnarda, purtads d'in rock bain ragischà e tuttina «indie», e d'ina poesia detg colurada.

Qua aud'ins – sper la ballada principala cun ses cler appel da libertad – ina blagheria da «gion ferm» (Physical Man), ina desditga a l'urbanissem surfatg (New York), in lament da tuschander (Fai tgei che ti vul). U lura dus u trais vers d'amur ed adina puspè fins muments visunars. La plipart chantada per rumantsch sur-silvan, danor trais excepziuns englaisas ed ina perfin per tudestg – tut però cun ina tempru marcanta plaina da soul.

La grupp «el mar» exista en il coc gia dapi precis ventg onns, ella è vegnida

fundada a Turitg dal ghitarrist *Thomas Gloor* e dal vocalist *Elmar Deflorin*, l'anteriur timunader dals renumads hardrockers sursilvans Hades. La vusch principala ha Elmar en il fratemp surlaschè a ses figl *Marius Deflorin*, barattond il microfon cun la batteria. Dapi plirs onns da la partida è er il bassist *Benjamin Tanner*, fertant che *Benedetto Vigne*, il rockadur pionier surmiran, è entrà avant quatter onns en la grupp sco segund ghitarrist.

Sin «temps d'esser libers» da la partida sco giast è il tastadur *Chris Egger*. L'album è vegnì produci da *Manfred Zazzi* en ses studio Aquarium a Turitg. La maschaida finala ed il mastering ha fatg *Peter Borföi*.



«el mar» – ina grupp multigeneraziunala, poliglotta e variostilistica preschenta ses emprim album «temps d'esser libers».